

ՀՀ Արմավիրի մարզպետ Համբարձում Մաթևոսյանի ուղերձը Հայոց ցեղասպանության զոհերի հիշատակի օրվա կապակցությամբ

24.04.2020

Արմավիրի մարզի հարգելի բնակիչներ, սիրելի հայրենակիցներ, Այսօր մեր համազգային վշտի՝ Հայոց ցեղասպանության 105-րդ տարելիցն է:

Օսմանյան Թուրքիայի իշխանություններն Առաջին աշխարհամարտի տարիներին ծրագրեցին և իրականացրեցին հայությանը բնաջնջելու հրեշավոր ոճրագործությունը: Եվ այսօր, գլուխ խոնարհելով մեր անմեղ նահատակների հիշատակի առջև, փաստում ենք, որ ջարդարարներին դա չի հաջողվել: Չի հաջողվել հայի անկոտրում կամքի և լինելիության վաստակած իրավունքի շնորհիվ:

Մենք այսօր երախտագիտությամբ հիշում ենք նաև Մեծ եղեռնը վերապրած մեր հայրենակիցներին, ովքեր հաղթահարելով անմարդկային տառապանքներն ու պարտադրված արտագաղթը՝ իրենց մեջ ուժ գտան վերահաստատվելու մայր Հայաստանում և սփյուռքում՝ վառ պահելով հայի ինքնությունն ու անունը:

Հայի դարավոր պատմությունը և մահին հաղթած տեսակը մեզ թույլ է տալիս ասելու, որ միայն մեր միասնականությամբ և հավերժող գոյությամբ կարող ենք հաղթահարել Հայոց ցեղասպանության հսկայական ցավը և վերականգնել պատմական արդարությունը: Իսկ այսօր, ավելի քան երբևէ, մենք պարտավոր ենք համախմբվել և վճռական քայլերով առաջ շարժվել՝ կերտելով մեր ազգի արժանապատիվ ներկան ու ապագան:

Հավերժ խոնարհում Հայոց մեծ եղեռնի սրբադասված նահատակների հիշատակին և փառք հայ ժողովրդին: